

Ein Pulffer Haus zu erbawen.

Wenn nun vorgehörter massen gut Pulffer gemacht worden/so ist fürnemlich an dem gelegen/das man es langwürig in seinem Volstand auch vor dem Feur vnd Feuchtigkeit erhalten möge/ dessen höchster Feind ist die Feuchtigkeit vnd das Feur/ sein bester Freund aber/ der frische truckene Luft/ die zwey erste nun zu meiden/ das dritte aber zu pflanzen/ muß ihme zu gefallen/ vnd mit höchstem Verstand/ ein besonderer Thurn oder Pulffer Behaltnuß/ solcher massen gebawet werden/ damit so vil möglich/ die Feuchtigkeit verwehrt/ vor dem Feur wol beschirmt/ vnd daß es nichts desto weniger sein guten täglichen Durchluft genießen möge/ zu welchem Ende/ vnd nach meinem geringfügen gutachten/ so habe ich ein neues/ sonst dergleichen zuvor nit gesehenes Pulfferhaus inventirt. Dasselbe ge aber mit gegenwertigen zweyen Kupfferblatten/ N°. 2. 3. ganz verträglich vorgestellt/ dero Bedeutung ist nun wie folgt.

Das Kupferblatt
No. 2.

Fazia des
Pulfferhauses.

Erstlich vnd bey dem Kupferblatt N°. 2. wird die eigentliche Fazia desselben auffgerissen/ dan bey .B. vnd durch ein eisern Thurn/ kan man in den Vorhof hinein gelangen/ Bey .M. M. M. aber/ wird sein von lauter vnd eines Werckschuch dickes von Quaterstücken gemachtes/ auch sauber zusammen gefügtes Dach gesehen/ welche/ vnd zwischen den ernañten Quaterstücken verbleibende Fügen aber/ sollen mit dem trefflich guten andern Delkitt/ (darvon in der des 1641. Jahrs außgangenē Architectura Privata an f. 57. der rechte modus diser so herzlich vnd beständigen Delkitt Præparirung/ genugsame instruction zu haben ist/ darauf ich mich nun referire) außgestrichen/ vñ hierdurch Stain an Stain gekittet werden/ damit aber in disen vnsern kalten Landen/ obberürte Quaterstück vnd im darob ligen des langwürigen Schnees/ sie nit verfrieren/ so muß man über dises noch ein ganz kupfferin Decken oder schein Dach machen/ welches einig vnd allein den Regen vñ Schnee abträgt/ alsdann so ist man versichert/ daß dises doppelt stainern vnd kupffern Dach/ vor Kälte/ Regen vnd Feur/ fast wie ein alte Römische Machina gleichsam bis zum Ende der Welt vnverfehrt zu stehn/ das ansehen hat/ Ist auch mit seiner Vormauern dermassen versehen/ vnd beschlossen/ daß man einiges Feur noch ander vnpassirlich ding/ so leichtlich nicht hinein werffen/ noch selbigem einigen Schaden zu thun vermag. Die ander Figur in besagtem Kupfferblatt N°. 2. aber daselbsten bey .C. demonstrirt den Vorhof des innern Gebäws/ welcher dan/ vnd bey .C. C. mit einer erhöchten/ von dar aber/ abhaldenden Holzdöllen also versehen ist/ daß ob schon ein Granaten oder andere Kugel in berürten Vorhof bey .C. C. oder bey .C. vñ .C. einfallen thete/ so würde sie doch an keinem Ort verbleiben/ noch sich irgends vffhalten können/ sonder sie muß natürlicher weiß/ (vnd von wegen der obbesagten abhaldenden Holzdöllen/ in welcher dan eben so wol auch das Regenwasser sein Ablauff nehmen thut/ dardurch dises Gebäw vor Feuchtigkeit trefflich wol beschirmt wird) gegen dem Loch .D. hin rollen/ vnd allda in ein hierzu gemachte Hölin einlauffen/ darinnen sie nun ihren effectu ohne einigen schaden vollbringen mag.

Ferner/